

EVALUACION DI CARNAVAL NO MESTER ATENDE SOLAMENTE PARTINAN NEGATIVO..

Fotos y Texto: Jan Poets.

DEN AMBIENTE

** E programa evaluacion carnaval cual a ser presenta pa Steve Matthew di Radio Galactica diadomingo siman pasa, por tabata mucho mas mihor, si Steve a atende e asuntunan interno di Aruba su carnaval prome y despues presenta e programa entre e rumannan di Antiyas. Cu tur respet pa e invitadonan di Antiyas, pero cada biaha cu e programa aki a ser presenta, nan ta bin tende tur e problemanan di nos carnaval cual ta problemanan cu mester keda interno y resolve pa nos propio hendenan. No por cu nos pañanan sushi ta ser tira den laira den cara di e invitadonan, mientras cu nan si ta tene nan pañanan sushi na nan cas.

DEN AMBIENTE a ser invita pa ta presente den e programa aki y na momento cu e oportunidad a duna, a presenta den e programa. E punto mas importante pa DEN AMBIENTE tabata e participacion di nos cantantenan den e festival di Tumba na Curacao, pa cual for di principio DEN AMBIENTE a señala cu esaki simplemente NO POR!

DEN AMBIENTE conoce e pueblo di Curacao "door ea door", nan ta stima nan cantantenan y ta fanatisimo del alma di nan. Nan por a wel simpatisa cu Ramphis den comienso, pero na momento cu e cay den e final y logra un titulo importante, anto ta e ora e

wega ta cuminsa. Durante e final di e festival esaki tabata un ehempel mas bibo cu nunca, na momento cu Otimilio Gonzalez a haya un aplauso masal durante cu nan a presente como su tumba di aña pasa "Spiritu di carnaval" a sali como esun mas popular y na e momento culminante cu el a sali na di tres luga, e publico a dune un BOE formal. Pues cu nan propio participantenan mes nan ta BOE, corda un di nos cantantenan. E festival di Tumba ta mas serio cu hopi hende ta pensa, ya cu aki cada cantante tin nan fanaticada. Mester bisa y admiti cu manda un tumbero di Aruba participa den un grandioso festival di Tumba na Curacao, ta mescos cu bo ta manda un boxdo di Aruba bay bringa cu manera entre otro un George Foreman. Awor si ta pa promocion e cantante kier bay pa promove su mes, esaki ta otro cuenta. E relacion entre Aruba y Curacao ta asina bunita aworaki, pa bay busca un riesgo den un competencia den un festival cu ta di nan, ta nan cos, laga nan cu nan cos. DEN AMBIENTE ta compronde cu Asosacion di Musico i Artista di Curacao ta mira e parti comercial cu ta trek hopi Arubiano pa Curacao, pero no ta mira e consecuencia cu esaki por trese cu ne den un competencia. Corda bon no tuma mi na malo, pero den wega



di placa no tin amigo. Mi a sugeri nan pa laga un Roadmarch King of e Rey di Tumba duna un presentacion, cual lo ta algo masha bunita y sin duda un atraccion special pa e publico di Curacao. Esaki nos ta yama un intercambio cultural bunita y sin riesgo di prob-

lema. Mi ta lamenta masha hopi mes cu Steve no a duna mi e oportunidad pa mi por a amplia esaki den un forma mas trankil y ta pura pura mi mester a papia, cual a trese un mal comprendemento entre un oyente. Pero mas importante tabata cu e propio

Feco Gomez a comprende mi y a duna mi rason tambe. DEN AMBIENTE ta spera cu otro aña Steve Matthew lo sa di tene bon cuenta cuanto persona ta ser invita y como meta di e programa pa yuda otro engrandece e actividadnan carnavalesco entre e islanan ruman di Antiyas.

BENCHO GIEL CU SU "DOMINATOR SOUND" PA DI DOS BIAHA TA DOMINA CARNAVAL CU SU POTENCIAL SONIDO..



** Pa di dos aña consecutivo Bencho Giel di Dominator Sound ta logra di conquista e premio como e mihor sonido durante e diferente paradanan di Carnaval 44. Den presencia di Elgin Juddan di ASOMA, Bibi Arends di Aruba Tivoli Club, Meiller Lourens di Quasi y Alvin Koolman di Coastal Club, Bencho Giel a

recibi su merecido reconocimiento. Ta di elogia e forma cooperativo cu Bencho Giel a sa di desplega durante nos carnaval brindando su potencial servicio di sonido na e diferente bandanan musical aki manera; BMW, Quasi, Taxx, Oreo y Los Duquez.

Aña pasa tabata DEN AMBIENTE cu a nombra

Bencho Giel su compania di sonido como e mihor di Carnaval y awor ta sumamente contento di por mira Bencho haya su merecido reconocimiento for di e personahenan riba foto.

PABIEN Bencho..un cos si..otro aña corda pone un motor di BMW den e truck di BMW..

